

# Senshywa agongwa n'imodoka




Umukuru w'Umudugudu wacu yari amaze iminsi ashishikariza ababyeyi bacu kugira ubwishingizi mu kwivuza. Bamwe mu baturage ntibumvaga akamaro kabyo.

Umunsi umwe, tuvuye ku ishuri, mugenzi wange Senshywa akora ikosa ryo kwambuka umuhanda atabanje kureba mu merekezo yombi. Byamuviriyemo kwiwira mu muhanda nuko imodoka iramugonga. Iminwa ye ihita yumywa n'igihunga. Hafi aho hari umukecuru wavanaga inshyamba mu bicuma yitegura kubijyana ku isoko, ngo aronke amafaranga. Yahise areka ibyo yakoraga, atabariza wa mwana. Aramwegera abona ari uwo kwa Nyiranshyamba na Gakumba, abaturanyi be.

Nyiri imodoka yihutira kunyarukana Senshywa kwa muganga, umukecuru na we yihutira kubwira ababyeyi b'umwana, baza bwangu bitwaje ikarita y'ubwisungane mu kwivuza. Abaganga bamutabara bidatinze, bomera ibikomere nuko baramudoda.

Uwo munsi Senshywa arara mu bitaro, bukeye umwarimu we aherekejwe n'abanyeshuri babiri baramusura. Bamuzanira akajerekani k'ikivuguto, bahumuriza ababyeyi b'umwana. Senshywa arabareba yibuka ko kizira gukinira mu muhanda no kwambuka, utabanje kureba mu merekezo yombi. Ahera ko yicuza ibyo yakozeho, afata ikemezo cyo kutazabisubira ukundi.



Mu minsi ibiri, Senshywa yari yorohewe, nuko kwa muganga baramusezerera arataha. Senshywa yari afite ubwoba. Yibazaga ukuntu iwabo bagiye guhombywa no kwishyura amafaranga menshi kubera amakosa ye. Ako kanya yegera se ati: “Nsabye imbabazi, sinzongera kubateza ibibazo.” Se aramubabarira. Bagiye kwishyura, se ahereza abishyura ikarita y’ubwisungane mu kwivuza, bafata ifishi ya Senshywa batangira kumubarira amafaranga agomba kwishyura. Yari yifitiye ubwoba, yibaza niba ari bubashe kwishyura ibitaro. Bamaze kumubarira, basanga agomba kwishyura amafaranga makeya pe!

Kuva uwo muni, Gakumba aba umuvugizi wa gahunda za Leta zo gukangurira abantu bose kugira ubwisungane mu kwivuza. Azenguruka ingo z’abaturanyi abaza niba baratanze amafaranga y’ubwisungane mu kwivuza. Iteka nyuma y’umuganda, yahabwaga ijamba agatanga ubuhamya ku byamubayeho. Akababwira ko iyo ugize ikibazo cy’uburwayi udafite ubwisungane mu kwivuza uhombywa no kwishyura amafaranga menshi. Anababwira ko utarembywa n’uburwayi kuko bivuze ku mafaranga make. Kuva ubwo, abaturage bose bahise bitabira kugira ubwisungane mu kwivuza kuko basanze ari ingirakamaro.

### Ibibazo byo kumva inkuru

1. Ni nde washishikarizaga ababyeyi gutanga ubwisungane mu kwivuza?
2. Ni iki cyatumye Senshywa agongwa n’imodoka?
3. Ni nde watabarije Senshywa?
4. Wakwitwara ute kugira ngo wirinde impanuka?
5. Vuga akamaro k’ubwisungane mu kwivuza
6. Ni iyihe nyigisho ukuye muri iyi nkuru?